

Sanctissimum Genebrardus : Abbas Urspergensis virum prudentem, venerandum, Apostolicæ Sedi semper irreprehensibiliter collaborantem. Vide Gelasii vitam à Pandulpho Pisano ejus synchrono conscriptam, studio & opera Constantini Cajetani editam : Martyrolog. Gallicanum ad diem 29. Januar. Martyrolog. Wionis ad dictam diem, Sigonium de Regno Italiæ libro 10. & Hugonem Menardum in not. ad Mart. Bened. sub die 27. Jan. qui à calumniis Orderici Vitalis Cœnobii Uticensis, seu Sancti Ebrulfi Monachi, libro 12. circa initium historiæ Ecclesiasticæ Normannorum Theopompino scriptiois genere exarata, Gelasium Sanctissimum vindicat.

Passio Sancti Erasmi Episcopi & Martyr. typis excusa est Romæ 1639. studio & opera præfati Cajetani. Actorum SS. Anatoliæ ac Cæsarii rhythmicè à Gelasio literis consignatorum meminit Baron. in Martyrolog. ad 9. Julii, quæ temporum injuria intercidisse existimamus.

Ex epistolis, quas scripsit, quinque refert Bimius tom. 7. Concil. Vide Baron. tom. 12. annal. anno 1118. & 1119. Regestum Paschalis II. Papæ ejus prædecessoris composuit, quod non extat, nisi MS.

CAPUT XLVI.

DE JOANNE.

JOannes Tiburtinus à Girardo Abb. in Casino susceptus, scripsit sermone simplici sermones de totius anni festivitatis, fecit & alia nonnulla, quæ in nostram notitiam non venerunt. Obiit autem temporibus Lotharii Imperatoris.

Claruit Anno Domini MCXX.

CAPUT XLVII.

DE PETRO.

Petrus Diaconus Casinensis Chartularius, ac Bibliothecarius, quinquennis sub Girardo Abbate Beato Benedicto oblatus à patre Ægidio, natione Romano, atque sub eodem Abbate per octo ferme annos eruditus est. Anno verò Incarnat. Dominicæ MCXXVIII. ætatis autem ejus XXI. cum Oderisius Girardi Abbatis successor Abbatiam reliquisset, ad exilium, æmulorum suorum faciente invidia, directus est. In ipso autem dum esset exilio, rogatus ab Adenulpho ejusdem Urbis Comite, descripsit ad Oderisium Abbatem passionem Beati Marci, & Sociorum ejus. Vitam egregii Confessoris Falconis. Vitam Sancti Placidi discipuli Sancti Benedicti. Vitam Sancti Apollinaris Abbatis. Vitam Sanctorum Guinizonis, & Januarii. Rhythmum de novissimis diebus, in

quo juxta literam videtur sequutus esse Apostolum Joannem, cum idem Petrus sciret juxta quod ibidem scriptum est, finitum pro infinito. Destructionem & restaurationem Atinæ Urbis in Beati Marci adjunxit historiam. Scripsit etiam sermones hos. De festivitate B. Marci sermones octo, sermonem in vigiliam ejus. De vigilia SS. Nicandri, & Marciani. Sermonem de Cœna Domini. Duos in Parasceve, in Sabbatho Sancto. Homiliam de Sancto Benedicto. In Pascha, in Ascensione, in Octava Sancti Benedicti, in Pentecoste, in festivitate Sancti Joannis Baptistæ, de Sancto Petro & Paulo, de Sancto Laurentio: in vigilia Sanctæ Mariæ. Librum Illustrium virorum Cœnobii Casinensis. Miracula Casinens. Monachorum, quæ scripta adhuc minimè erant, descripsit. Historiam de eversione, seu restauratione Cœnobii Beati Mauri ex jussione Abbatis Senioretti emendavit, in qua & prologum scripsit. Fecit & prologum in libro privilegiorum ex rogatu Raynaldi Subdiaconi Casinensis. De S. Nicandro sermonem. De translatione Sancti Stephani Protomart. à Civitate Constantinopolitana ad Urbem Romam. De ortu & vita Justorum Cœnobii Casin. In festivitate omnium Sanctorum. De Nativitate Domini sermones duos. De Sancto Stephano. Chronica Cœnobii Casin. à renovatione Ecclesiæ Beati Martini à Desiderio facta, usque ad hunc diem. Astronomiam ex veteribus libris collegit. Solinum de miraculis brevavit. De generibus lapidum pretiosorum librum exaravit. Expositionem Regulæ in quatuor libros divisit. Scholia in veteri testamento. Epistolas duas ad Lotharium Imperatorem. Ad Richizam Imperatricem. Librum notarum ex parvo ampliore fecit. Vitruvium de Architectura Mundi abbreviavit. Librum Heve (*) Regis Arabum de lapidibus transtulit. Hymnum de Sancta Christina. Vitam Sancti Constantii Episcopi. Epistolam ad Conradum Imperatorem. Visionem Alberici Monachi Casin. corruptam emendavit. Scripsit & vitam Sancti Severi Episcopi, & Confess. ex rogatu Raynaldi Subdiaconi Casin. De Sancto Nicandro, & Marciano sermonem de translatione, & Chronicam Consulium, Dictatorum, & Imperatorum composuit. Translationem Beati Marci in Civitate Atina, & ejus miracula exaravit. Cantus Beati Marci composuit, & Sanctorum Nicandri, & Marciani. Obiit autem in Casino & ibi sepultus est.

A N.

(*) Evacis.

E